


62% di personanan cu ta registra na FPNC ta Arubiano



ORANJESTAD - Di esaki por bisa cu un 36% ta hende homber y 64% ta hende muhe, segun directora di Fundacion pa nos comunidad. E ta sigui bisa di e total

di hende cu ta registra 37% ta mucha. Esey kiermen si cualkier hende cu tabata tin dudanan pa sostene e fundacion, awo tur hende por haya sa cu gran parti cu por

beneficia di e unico banco di cuminda cu tin na Aruba, e banco di cuminda nacional, ta e muchanan ta esunnan cu ta hayando e yudansa necesario. Ta importante pa e fundacion di menciona cu e cantidad di hende cu nan a yuda, a aumenta.

Semper e fundacion ta haya preguntanan si e hendenan cu nan ta yuda ta Arubiano, cual ta loke nan ta haya interesante. Pero tambe hendenan kier sa cua ta e nacionalidadnan cu ta acerca e fundacion pa ayudo. Ta interesante pa keda corda cu e cifranan ta indica e cantidad di famia cu ta wordo yuda. 62% di persona cu ta ricibi ayudo for di

e fundacion ta Arubiano, y ta naci na Aruba, segun e directora.

E directora a sigui bisa, nan no ta papiando di e yiunan di e clientenan cu kisas no ta di Aruba. E personanan cu ta firma e formulario ta Arubiano y esaki ta yega na e porcentahe di 62% ta Arubiano. Si ainda tin hende cu tin duda si nan ta yudando un yiu di tera, e cifranan di Fundacion pa nos comunidad mes ta indica esaki.

Na 2013 a duna 2424 pakete a wordo parti, y compara cu 2012 nan a parti un total di 2260. Esaki ta significa cu

a parti 164 pakete extra aña pasa. E esey ta muestra cu e cantidad di famia cu nan ta yuda a keda mas o menos mescos, segun sra. Stamper. En berdad ta cu nan a haya un aumento den cantidad di hende, famia, y pakete, pero no hopi. Cualquiera hende cu tin pregunta of ta interesa cu algo pa e fundacion por informa e pueblo di esaki, semper por tuma contacto cu nan. Segun sra. Stamper, semper nan ta habri pa scucha idea of pregunta di e comunidad. Tur esunnan cu ta interesa pa haya mas informacion por tuma contacto na 588-0002 of via e-mail info@fpnc.com. □

Fundacion pa nos comunidad a yuda 1620 famia aña pasa

ORANJESTAD - Directora di Fundacion pa nos comunidad, esta sra. Indra Stamper, a duna di conoce riba e cifranan aña 2013. El a haci esaki pasobra e ta desea pa tur esunnan cu ta sostene Fundacion pa nos comunidad, pa haya sa un tiki informacion di kico precies, kende nan a yuda, y con hopi nan a yuda tur hende. Esakinan



ta aspectonan importante di ayudo.

Fundacion pa nos comunidad ta sinti cu ta sumamente importante pa duna pueblo e informacionnan necesario pa cu nan trabou. Desde 1 aña y mey nan a cuminsa cu esaki, y nan kier sigui informa e comunidad. Nan kier pa esaki bira algo anual unda cu nan ta trece e informacionnan aki dilanti.

FAMIA REGISTRA

Pa Fundacion pa nos comunidad ta sumamente importante pa tur hende haya sa cuanto famia a wordo yuda. Aña pasa e cantidad di famia registra cu nan a yuda tabata 1620. Si pone e cantidad di famia cu a wordo yuda pa aña, y como cu Fundacion pa nos comunidad ta existi pa cuater aña caba, esaki lo ta mas o menos 400 famia pa aña cu a registra na e fundacion. E cantidad di persona cu a fundacion a yuda ta 4472 persona.

Fundacion pa nos comuni-

dad a tuma e tempo pa duna e cifranan aki, pasobra danki na tur esunnan cu ta contribui pa e fundacion por cumpra cuminda y yuda e famianan aki, mas di 4400 persona a wordo yuda den e ultimo tempoman aki.

Esey ta algo great pa tur hende sa, pasobra nan mester sa e placa cu nan a duna a wordo uza pa yuda famianan den necesidad.

COMPARACION CU AÑA ANTERIOR

Haciendo un comparacion cu aña anterior, nan a cera 2012 cu 1200 famia, mientras cu aña pasa esaki tabata cu 1620. Esaki ta indica cu aña pasa 460 famia mas a registra na Fundacion pa nos comunidad. segun sra. Stamper, na nan a cera aña 2012 cu 3322 persona cu a wordo yuda, y na 2013 4472 persona cu a wordo yuda. Den porcentahe el a subi cu 35% den cantidad di persona, mientras cu esaki a subi cu 26% den cantidad di famia. □